

Lele Inievo Ra Riẹ Yeri

“Wha gbẹ hai thihakọ kẹ ohwohwo jẹ ọvẹ ohwohwo no eva ze nọ ohwo ọ tẹ maki wo oware jọ nọ u re ru ei go kpahe omofa.”—Ahwo Kọlọsi 3:13.

U woma re ohwo o wuhẹ epanọ a re ku ẹme họ, yọ obọ uwou who re wuhẹ iẹe no ze. Rehọ enọ nọ e rrọ oboto na vuhu, kiẹ, je ku ẹwhọ nọ ọ rrọ udevie ra avọ oniọvo ra họ.



VUHU ẸBẸBẸ NA

Oniọvo ra vẹ whẹ avọ iẹe wha rẹ mae whọ kpaobọ?

Eme ọ rẹ mae wha ẹwhọ na ze?

Ẹvẹ ẹwhọ na ọ rẹ mai ro muhọ?

Oniọvo mẹ o re . . . (gbe oware nọ o via na ze)

yọ o rẹ lẹlẹ omẹ . . . (ta oware nọ who re ru ze)

Onọ o rẹ whae ze nọ . . . (ta oware nọ u re no emu riẹ ze)



KIĘ ĘBĘBĘ NA RIWI

EBAIBOL Ọ TA NỌ:
“Wha gwọlọ ewoma obọrai ọvo ho, rekọ ewoma amọfa re.”
(Ahwo Filipai 2:4) Nọ o rrọ ere na, daoma roro oware nọ o jọ oniọvo ra iroro nọ o wha ẹme na ze.

Eme who roro nọ oniọvo ra o je roro evaọ okenọ wha je whọ na?

A tẹ ta kẹ oniọvo ra nọ o gbiku oware nọ o via na ze, eme who roro nọ ọ te ta nọ **who ru** nọ o wha ẹwhọ na ze?

Eme whọ ruẹ nọ who ruthọ evaọ eme nọ oniọvo ra ọ ta na?



KU ẸWHỌ NA HỌ

Kọ wha sai ku ẹwhọ na họ hayo kpairoro vrẹ ẹme na? Oterọ ere eme who roro nọ ọ sai ku ẹwhọ na họ?

Eme **whọ** rẹ sai ru ẹdẹfa re ẹmẹme ọsese o gbe su kpohọ ẹwhọ họ?



EHRE EBAIBOL

Ohrę Ebaibol vę evaọ usu enọ e rrọ oboto na who ti fihọ iruo edefa nọ whọ te wo ęme kugbe oniọvo ra?

- “Jọ wha you ohwohwo gaga no udu ze.”—1 Pita 1:22.
- “Wha ru re ahwo kpobi a ruę nọ wha wo iroro.”—Ahwo Filipai 4:5.
- “Whọ kaki mu ofu hu, keme ofu ọ rę ruọ igbama ohwo ogheghe.”
—Ọtausiwoma Na 7:9.
- “Emuhọ ẹwhọ kpobi ọ wọhọ ame nọ a kufię; fikiere nyavre re ẹwhọ ọ tẹ via.”—Itẹ 17:14.
- “Nọ ire e rọ erae he, erae i ve fu, ohwo nọ o re guędhọ-emu ọ rọ oria ha ẹwhọ o ve re.”—Itẹ 26:20.
- “Kọ fikieme who bi ro rri orara nọ o rrọ ubiero oniọvo ra reko who bi muerohọ ubro-ure nọ o rrọ ubiero ra ha?”—Matiu 7:3.

Obonana, kere oware jọ nọ o were owhe evaọ oma oniọvo ra.

EME WHO TI RU?

EBAIBOL O TA NỌ:
“Eme izuehọ ahwo jọ i re duwe wọhọ ọgbodo, rekọ ẹrọ ohwo owareghe ọ re wha usiwo tha.”
—Ite 12:18.

“Nọ ọse me ọ jọ obọ ẹsipito evaọ oke krẹkri, o jọ bebẹ ke omẹ re me nyae ruẹ e riẹ keme me sae dhẹ omoto ho. Mẹ tẹ ta ke oniọvo me nọ me gwọlọ wo obe-udu nọ a re rọ dhẹ omoto, rekọ ọ tẹ ta ke omẹ nọ o wo uve nọ o ti ro wuhre omẹ omoto ọdhe he. Nọ me make vuẹ oware nọ me rọ gwọlọ ru ere, ọ kpọ omẹ unu dede he. Eva e tẹ dha omẹ te epanọ me ro zue eme họ kee inọ ọ be daezọ me he, yọ ọse me nọ me be sae nyae ruẹ he na ọ riẹ epanọ o rro omẹ oma ha. Oyena o lẹliẹ eva dha oniọvo me gaga. Ewhọ o te kie, ma te mu eme họ ẹrọ fa ohwohwo ovaọ kpahe epanọ ohwo ọdekọ ọ geva te.”
—Karina.

Oteronọ whẹ họ Karina, ẹwe **whọ** hai ro ku ẹme na họ?

OWARE NỌ KARINA O RU: “Ohiohiẹ okiokio riẹ, me avọ oniọvo me ma tẹ keria ta ẹme na. Oniọvo me o te wounu ke omẹ je vuẹ omẹ oware nọ o via nọ eva e rọ dhae te ere. Mẹ riẹ vere nọ eware i bu rie abọ tere he. Nọ ọ vuẹ omẹ oghere nọ eware e jariẹ oma no, me te wounu kee fiki epanọ me je rọ gwọlọ fiba ebẹbẹ riẹ. Mẹ riẹ nọ oma-mọ oware me je gwọlọ ru, rekọ oke yena me hae rọ rehọ iẹ ze he.”

